



*Iesus supplié de la part de Marthe & Marie, vient en Bethanie ; & resuscite des morts leur frere le Lazare , decedé.*

**M**ARTHE & Marie voyans leur frere le Lazare en danger de mort , enuoyerent vers Iesus pour y remedier. Iesus ayant ouï cela, dist ; La maladie n'est point à la mort, mais pour la gloire de Dieu ; & vint en Bethanie : Or auant qu'il fut venu le Lazare estoit mort, dont grands pleurs estoient faits par Marthe & par Marie , & les Iuifs qui estoient venus les consoler. Marthe sçachant la venuë de Iesus, vint au deuant ; & Marie sa sœur se ietta à ses pieds, luy disant ; Seigneur, si tu eusses esté icy, nostre frere ne fust point mort ; Iesus luy dist , Ton frere ressuscitera ; Je sçay, dit Marthe, qu'il ressuscitera au dernier iour. Quand donc Iesus les vid tous pleurans , il fremit en son esprit, & s'emeût, & dist : Où l'auiez-vous mis ? & luy ayans montré le sepulchre, Iesus pleura, & dist ; Ostez la pierre ; mais Marthe dist ; Seigneur il püst, il y a quatre iours qu'il est mort ; or la pierre fut leuée. Adonc Iesus leuant les yeux en haut, rendit graces à Dieu qui l'auoit exaucé ; & cria à haute voix, Lazare vient dehors. Adonc sortit le mort, ayant les pieds & les mains liez de bandes & sa face enuelopée d'un couurechef. Iesus dist, Desliez-le, & le laissez aller : lors plusieurs Iuifs admirans ces choses, creurent en luy ; & les autres le dirent aux Phariens qui en tindrent conseil, où Caïphe grand Sacrificateur, resolut, qu'il estoit expedient qu'un homme mourut pour le peuple, & non point que toute la nation perist.

*S. Iean Chap. 11.*